



# Kattusseqatigiit Partiiat

10 august 2009

UKA 2009/76

Inatsisartut Suleriaasianni § 36, imm. 2 naapertorlugu Naalakkersuisunut apeqquq imaattoq matumuuna saqummiuppara:

**Naalakkersuisunut apeqquq: Saarullinnut, saattuanut nipisaallu suaannut tunitsivissaqarniarneq, siunissaq ungasinnerusoq isigalugu qulakkeerniarlugu Naalakkersuisut qanoq iliuuseqarniarpat?**

(Inatsisartunut ilaasortaq, Jakob Skade, Kattusseqatigiit Partiiat)

## **Tungavilersuut:**

Piffissami kingullermi takusaannarpagut pilertupallattumik aaqqiiniarnerit, soorlu Naalakkersuisuusimasut immikkut tapiiffigisassatut qinnuteqartariaqartarsimasut sinerissami tunitsivissat attatiinnarnissaat piumallugu.

**Kattusseqatigiit Partiiat** Naalakkersuisut pilersaarutaat paaserusuppagut aalisarnermik inuussutissarsiuteqartut aamma ingerlaniarnerminni pisariaqartimmatikkit, taamaalillutik aamma tulluussarsinnaanermut periarfissaqarniassammata.

Naluneqanngilaq ukiuni kingullerni saarullit nunatta sineriaanut takkukkiartuinnartut aamma ilisimaneqarpoq; Aamma ilisimaneqarpoq saarullinnut, saattussanut nipisaallu suaannut aalisakkanullumi allanut tunitsiveqartitsiniarneq ilaatigut ajornartorsiutaasartoq.

Tassami pingaartumik aamma ukioq manna aalisakkanut tunitsiviit ilarpassuisa matuneqarnerat aalisartut aalisakkanik tunitsiveqartitsinikkut assorujussuaq ernumalersitsivoq.

Taamaattumik aalisartunut aningaasarsiornikkut pitsaanerusunik periarfissiisoqarnissaa anguniarlugu tunitsiveqarnikkut pitsaanerujussuarnik periarfissiisoqarnissaa matumuuna Kattusseqatigiit Partiiat ujartorparput.

Maannamut nalunngisavut naapertorlugut, minnerunngitsumillu aamma aalisartunik saaffigineqartarningut tungavigalungit – paasitineqartuarpungut nunaqarfiit ilaanni aalisakkanik tunitsiveqartitsiniarneq aalisartunut assut kinguarsaataallunilu aningaasarsiorniarnermut ilungersunartorsiortitsisartoq.

Ilami allaat nalunngilarput; aalisakkat ilaatingut tons-erpassuit asiutiinnarneqartartut.

Taamaattumik saarullit takkukkaluttuinnarneranni aningaasarsiornikkut pitsaanerusumik iluanaarutigineqarnissaat anguniarlugu tunitsiveqarnikkut kitaani tunumilu tunitsivissanik qulakkeerisoqarnissaa sulissutigineqarnissaa pisariaqarlunnartoq isumaqarpungut.

Taakku sanitigut aamma ilisimaneqarpoq saattussanut aamma nipisaat suaannut tunitsiveqatitsiniarneq aamma ajornartorsiutaasartoq.

Taamaammat aalisartoqarfinni assigiinngitsutigut tunitsiveqartitsinissamik  
qulakkeerinnittoqarnissaa aalisartunut inuiaqatigiinnullu aningaasaqarnikkut  
pittaanerulersitsisussaammat iluarsiiisoqarnissaa Kattusseqatigiit Partiianiit  
piumasaqaatingaarput.

Suliniut naalackersuinikkut pitsaasumik naammassineqassapat, tamanna nunatta  
aningaasaqarniarneranut iluaqutaaginnarani, kisianni aamma ilaqutariippassuit  
nunaqarfippassuillu ingerlalluarnerulernissaannut pitsaanerusunik periarfissiinermik  
kinguneqartussaapput.